

**Təntən sagı tə,  
Zwan  
nə púpóní  
Zwan təntən sagı tə yuu wa  
sugv**

*Lìu tə, v nə púpóní sagı kv tə*

Lìa zənzən buŋa də, kv yi \*tuntunv Zwan nə púpóní kv. Mə v mù Zwan təntə tətə nə púpóní Zwezi-\*Kərisə svyváŋv tə.

*Lìa tə nə, Zwan nə púpóní*

Zwan púpóní sagı kv tə v pa \*Kərisə lìa púlé tə nə, ba nə gugurə tə də kunkun kàrà.

*Sagı tə wa sugv*

Yìèn yà zva \*Kərisə lìa púlé tə wa. Kərisə lìa púlí tə wa lìa duən yà gıgarı Kərisə lìa duən ba dıga. Ba yà kàrì kunkun kàrà Zwezi yuu wa, də nətv lìa nə mə, sə v ya Kərisə lìa yuu wa.

Zwan pìà v bırı ba də, Zwezi-Kərisə yi ləzwənə cıgá cıgá. D yi Yu tə, v nə wulə mı wa, bıú. Yu yi poni, Yu yi sonu. Nə twá də Zwezi də Yu-\*Sıju tə nə, nə ma yèé kv nətv tə. D mù nə sın nə cvna tə mama v lı. Cıgá cıgá Kərisə lìa yi lìa tə, v nə twá kàrà tə nə, ba nə bırı wá kv jıv mama, ndə kv nə mə nətv. Zwezi-Kərisə tì v mı, v ma lárí lìa tə duən yuu nə. Kv nətv dãn bırı də, v swə Yu v ga yèé Yu də. Cıgá cıgá Kərisə lìa də dãn mə, sə v tì v mı tə, v ma lárí v duən Kərisə lìa tə yuu nə.

*Zwezi yi mu sugu*  
(*Zwan 1.1-14; 1 Zwan 5.11-13*)

<sup>1</sup> Nə cugu liù kori. Nə ni wá də nə yía. Nə balu wá zəni. Nə dwen v yira də nə jìàn. D mù nə yi liù tə, v nə yin lá, ku jju mama. Ku liù təntə nə yi sugu tə, ku pin mu lià nə. <sup>2</sup> Liù tə, v nə yi mu, biri v tiàn nəba. Yá nə mù ni wá. Mə v yoo nə nə dàñ swìn, nə biri aba. Nə swìn v mù liù təntə yoo á con. D mù nə yi mu tə, ku nə ba zwèe Yu con. D mù yà nə yin də nə nyina Yu tə. D mù liù tə v nə biri v tiàn nəba, <sup>3</sup> nə ni wá, nə ga ni v kori. D mù yoo nə, nə swìn á də con, sə á də ja nimarv də nəba. Nə də con nə, nə də jə \*nimarv də nyina Yu, v də v biù Zwezi-\*Kərisə. <sup>4</sup> Tə yìèn tə yi, nə púpúní tə á nə, sə ku pa nə pupwən tə sú.

*Á yana poni lià*  
(*Éfəzə tiàn 5.8-14; Titə 2.14*)

<sup>5</sup> Á nəṅə sugu tə, nə nə ni v con, yá nə dàñ ga pià nə swìn ku nə biri aba. Sugu təntə nə yi: Yu yi poni Yu. Yá yikunu təlè v con. <sup>6</sup> Nə nə swìn də, nə jə \*nimarv də Yu, yá nə ga tɔŋa yikunu wa yìèn, nə yi kunkuna, nə ga ba cígá tə nii nə twá. <sup>7</sup> Yu yi poni Yu. Yá nə nə yi poni lià ndə v nə, nə wá ja nimarv duən pwərə wa. Yá Yu biù Zwezi jana tə, tə nə nan v tian tə máŋá wa, dàñ wá sɔn nə cuna tə mama, tə li.

<sup>8</sup> Nə nə swìn də, nə ba cuna tɔŋa, nə yi nə gɔgari nə tiàn, cígá ga təlè də nəba. <sup>9</sup> Nə nə swìn nə biri də, nə fwa cuna, Yu wá sèe v kwen tə cuna tə, nə mù də wá pwərə wa. Yá v ga wá sɔn nə kunkun yìèn tə mama. Yu wá fwa ku, v

yoo nə yi pùé nədʊ tíú, ʊ ga yi cígá tíú tə yiri.  
<sup>10</sup> Yá nə nə swìn də, nə ba cuna tun, ku yi nə  
 biri də, ʊ yi kunkunu, ʊ sugu tə ga tələ nə waa.

## 2

*Zwezi nə wá zigi nə jirimv Yu yáá con*  
*(Zwan 13.34-35; 14.21-24; 15.12-14)*

<sup>1</sup> À bisíná-ba, à púpúní tə yìèn tə mama á  
 nə, sə á dànà ká fwa cuna. Yá liù nə cùgù, nə  
 jə liù, ʊ wá zigi nə jirimv, ku yoo tə wa. Ku  
 tíú wulə nyina Yu səpuni nə. Ku liù tə nə yi  
 Zwezi-\*Kərisə. Yá ʊ mù dàn nə yi cígá tíú. <sup>2</sup> Ɔ  
 mù tətə nə tɪga ndə nə yuu \*jɔŋi vani ba nə  
 gwa, sə ku sɪn nə cuna tə. Ku tà nə mù cɪcɪ  
 cuna tə ka li yiri, ku yi là tə də mama cuna  
 yiri.

<sup>3</sup> Won tə nə biri nəba, də nə yèé Yu, ku yi,  
 də nə nə zílí ʊ nii yìèn tə. <sup>4</sup> Liù nə wú, ʊ yèé  
 Yu, ʊ ga ba ʊ nii yìèn tə zílí, ku tíú yi kunkunu,  
 cígá ga tələ ku tíú con. <sup>5</sup> Liù tə, ʊ nə jin ʊ sugu  
 ʊ bɪcan wa, Yu sonu tə cígá súé wá. Ku nətu  
 tə biri də, nə mù də Yu vwə duən nə. <sup>6</sup> Liù tə,  
 ʊ nə swìn də, ʊ wá vwə ʊ tìàn, Yu yira máŋá  
 mama wuu, ku tíú mə, sə ʊ ya ndə Zwezi nə  
 yi nətu.

*Ka sóní duən yoo*

<sup>7</sup> À nubisoni-ba, ku tə, à nə púpúní á nə, ku tà  
 \*nii yoo nədun yoo. Ku nii tətə, à nə púpúní  
 ku yoo á nə, yi nədwan. Ku nii yoo tə yin də  
 aba, ku jɪv mama. Ku mù nə yi sugu nədwan  
 tə, á nə nì. <sup>8</sup> Nii nədwan tə yoo, à nə púpúní,  
 à pa aba tə, ku nii yoo tə yi nədun də. Ku

twá Zwezi də aba, ku ma buru ku tìàn də, ku yu cígá. Yikunu vii, nə ga manwari nə na poni, ku pɪpɪ. <sup>9</sup> Də liù nə swìn də, v wulə poni wa, ku tíú ga ba v don tə, v nə yu v nubiu \*Kərisə yiri, swə, v mù liù təntə tə wà yikunu wa nan. <sup>10</sup> Liù tə, v nə swə v don, v nə yu v nubiu Kərisə yiri, ku tíú tə wulə poni wa, máǵá mama wuu. Yá won ga tələ v waa con, ku nə wá pa v dɔɔ Yü cwəŋə tə. <sup>11</sup> Yá liù tə, v dǎn nə ba v don, v nə yu v nubiu Kərisə yiri, swə, ku tíú tə wulə yikunu wa, v ga vələ tə wa. D yèrì bwálí tə, v nə vələ, yikunu tə nə púé v yía nə yiri.

*(Romə tìán 12.2; Zwakə 4.4; Matìə 6.24)*

<sup>12</sup> À bìsíná-ba, à púpúní á nə, sə à swìn á con də, Yü twá Zwezi yiri tə nə, v ma sɛə v kwen á cuna tə, v li á mù də wá pwərə wa. <sup>13</sup> À nyina-ba, à púpúní á nə, á nə yèé liù\* tə, v nə yin lá, luv jɪv mama wa yiri. À púpúní á nə, balandura-ba, á nə dí dǎn \*Sítana tə yuu wa yiri. <sup>14</sup> À bìsíná-ba, à púpúní á nə, á nə yèé á nyina Yü tə yiri. À nyina-ba, à púpúní á nə, á nə yèé liù tə, v nə yin lá luv jɪv mama wa yiri. Balandura-ba, à púpúní á nə, á nə dà, yá Yü sɔɔv tə ga wulə á waa, máǵá mama wuu tə yiri. Ku súrì lá, á dí dǎn Sítana tə yuu wa. <sup>15</sup> Á dǎnà ká sóní luv yìèn tə, nə à yèé ku wa wièn tə. Liù nə swə wièn tə nə wulə luv ku tə wa, ku tíú ba nyina Yü swə. <sup>16</sup> Á nəŋə wièn tə mama, tə nə wulə luv wa: Tə mù nə yu, ləzwəne púé yokɔkwɪnan fira, də v yía ka zɔ lǎ wièn,

\* **2:13** 2.13 Ku yu Zwezi yoo nə ku swìn.

də v wojan fwie. Tə wiən tēntə wà nyina Yui con nan, tə yi tə wulə luv ku tə wa. <sup>17</sup> Á lwara də, luv də ku yokukwɪnan fira tə wulə tə kēēn. Yá liù tə, v dān nə fwa Yui fira, ku tíú wulə mu wa, ku nə ba zwèe v con.

(1 Zwan 4.1-6; 2 Zwan 7-11; Zwan 16.13-15)

<sup>18</sup> Á bisíná-ba, luv zaŋv máŋá bwələ. Á nì də, ba swìn də, Zwezi-\*Kərisə duŋv wá bà. Yá síún nə, Zwezi-Kərisə duŋa dáá, ba nə wulə. Ku nətv tə pɪn, nə lwarɪ də, ku yi luv zaŋv máŋá nə bwələ. <sup>19</sup> Zwezi-Kərisə duŋa tə nan nə tətəŋi wa. Yá ba dān yà tà nə wa là fuən. Də ba yà nə yi nə wa là, ba yà bá nan ba yá nəba. Ku nətv tə fwa, sə ku ma bɪrɪ də, ba mama yà tà nə wa là. <sup>20</sup> Yá á mù jon Yui-\*Siŋu tə. Ku yi Zwezi-Kərisə nə pɪn ku aba. Mə ku mù nə pɪn, á mù mama yèé cígá tə. <sup>21</sup> Ku tà à púpúní á nə, sə à swìn də, á yèrì cígá tə. Ku yi à púpúní, sə à bɪrɪ də, á yèé ka. Á dān mə, sə á yəni də, kunkun nədv də ba cígá tə con naŋa. <sup>22</sup> Wàà nə yi kunkunv? Ku yi liù tə, v nə swìn də, Zwezi tà Kərisə. D mù nə yi Zwezi-Kərisə duŋv. D mù nə vi nyina Yui də v biú tə mama bələ. <sup>23</sup> Liù tə, v nə vɪga biú tə, ku tíú tə vɪga nyina tə də. Liù tə, v nə sèe biú tə, ku tíú tə sèe nyina tə də. <sup>24</sup> Á zɪga yoo tə yuu wa, á nə nì ku dēn laŋv wa. Á nə zɪga ku tə yuu wa, á nə nì máŋá tə wa, ku nə tun, ku bɪrɪ də, á wá vwə á tiàn nyina Yui də v biú Zwezi yɪra máŋá mama wuu. <sup>25</sup> Yá á nəŋə, biú tə kàn nii də, v wá pa nəba mu tə, ku nə ba zwèe Yui con.

<sup>26</sup> À púpúní tē yìèn tē, à pa aba, là tē yiri, ba nē wulē ba gɪgiri aba. <sup>27</sup> Á mù con nē, Kērisē pin aba Yu-Siɲu tē. Ku súsé aba, yá á kùù ba liù don kàrà pìà. D Siɲu tē cígá kàrà aba yìèn tē mama, yuu wa. Tē tē yuu wa, ku nē kàrì aba, tē yi cígá, tē tà kunkun. Ku mù nē pin, á twá kàrà tē nii nē, v Siɲu tē nē biri aba. Yá á ga wulē dē Zwezi-Kērisē máná mama wuuu.

*(Zwan 1.12-13; Romē tìán 8.14-19; 1 Zwan 5.18)*

<sup>28</sup> À bìsíná-ba, ku mù tē yiri, á vwə á tìàn Zwezi-Kērisē yira máná mama wuuu. Ku mù nē wá pa dùn tē, v nē wá pìì v bà, sē nē zēn nē yēni dē, fēn tēlól, cavira dē dàn ká ja nēba v yáá con. <sup>29</sup> Á yèé dē, Yu yi cígá tíú. Á dàn mē, sē á yēni dē, liù tē, v nē tuɲa dē cígá, yi v biú.

### 3

#### *Llà tē, ba nē yi Yu bia yoo*

<sup>1</sup> Á nēɲē tē nē, nyina Yu nē sóní nēba zēnzēn nētɔ. D sonu tē pin, v boɲē nēba v bia. Yá nē cígá ga yi Yu bia dē. Là tē, luv nē ti ba, wà Yu yēni. Ku mù nē pin, ba yèrì nē dē. <sup>2</sup> À nubisoni-ba, síún nē, nē dàn yi Yu bia. Yá won tē, nē nē wá yà, Yu tē wà ku biri. Nē dàn nē yèé dē, Zwezi-\*Kērisē nē wá pìì v bà, máná tē wa, nē wá na nētɔ tē, v nē yi. Yá nē wá lwàń, nē jì ndē v nē. <sup>3</sup> Liù tē mama, v nē jē yala tēntē Zwezi-Kērisē con, ku tíú yáá kē dìàn, sē v kwen v bican, sē ku ya nēpon Yu yáá con. Yá v dàn

wá yà ndə Zwezi-Kərisə tətə nə, ɔ bɪcan nə yɪ nəpon Yɪ yáá con.

*Cvna liù ba Yɪ nii yìèn zìlí*

<sup>4</sup> Liù tə mama, ɔ nə tɔŋa cvna, kv tíú vɪga Yɪ \*nii. Kv dàn pìà kv bɪrɪ də, cvna yɪ ka vɪ Yɪ nii zìlɔ́. <sup>5</sup> Á yèé də, Zwezi-\*Kərisə twi tia yuu wa, sə ɔ lɪ lià cvna. Yá ɔ tətə yuu ba cvna jə. <sup>6</sup> Liù tə mama, ɔ də wá dàn nə vwə duən nə, máŋá mama wuuu, kúù ba cvna fwa. Yá liù tə ɔ nə tɔŋa cvna, kv tíú tə wà wá nɪ, ɔ ga yèrì wá də.

<sup>7</sup> Á bisíná-ba, á dànà ká pa liù mama gɪgɪrɪ aba. Liù tə, ɔ nə tɔŋa də cígá, kv tíú yɪ cígá tíú, ndə Zwezi-Kərisə tətə nə yɪ cígá tíú nɛtɔ.

<sup>8</sup> \*Sítana nə tɔŋa cvna, kv jɪjɔ mama. Kv mù nə pɪn, liù tə, ɔ nə tɔŋa cvna ɔ yɪ Sítana nə tɪ. Yɪ-Biu Zwezi-Kərisə twi tia yuu wa, sə ɔ cùgù Sítana tutɔnan tə mama.

<sup>9</sup> Liù tə mama, ɔ dàn nə ya Yɪ biú, ɔ jə Yɪ mɪ tə. ɔ ga ba cvna tɔŋa. Yɪ dàn nə yɪ ɔ nyɪna. Kv mù nə pɪn, ɔ wàrì cvna ɔ tɔŋa. <sup>10</sup> Mə kv twá nɛtɔ, ba ma lwarɪ Yɪ bia tə də Sítana bia tə swíán duən wa. Liù tə mama, ɔ nə ba tɔŋa də cígá, kv tíú tà Yɪ biú. Liù tə də, ɔ nə ba ɔ don, ɔ nə yɪ ɔ nubiu Kərisə yɪrɪ, swə, ɔ də tà Yɪ biú.

*Nii sonu də bɪcan sonu yoo*

*(Zwan 15.12-21; 1 Zwan 4.7-8, 16-21)*

<sup>11</sup> Kv tə, ba nə swìn, ba pa á nì, kv jɪjɔ mama, kv mù nə yɪ, sə nə sóní duən. <sup>12</sup> Nə wà mɛ, sə nə ya ndə Kayen nə. ɔ mù yà yɪ \*Sítana nə tɪ. Kayen gva ɔ nyánú. Yá bèèè nə pɪn, ɔ ma gv ɔ nyánú tə? Kv yɪ ɔ mù Kayen tutɔnan yà

yi tutunkunkwɪnan, yá v nyánú tɛ tutunan ga zɪən. Kɔ m̀ nɛ pɪn, v ma gu wá. <sup>13</sup> À nubɪa-ba, á dànà ká pa kɔ dì á yuu dɛ l̀à tɛ, luv nɛ tɪ ba nɛ dɔŋa aba. <sup>14</sup> Nɛ swɛ nɛ duɛn tɛ, ba nɛ yi nɛ nubɪa \*Kɛrisɛ yɪri. Kɔ m̀ nɛ pɪn, nɛ yèé dɛ, nɛ nan tɪan wa, nɛ zu mu wa, kɔ nɛ ba zwèe Yɪ con. Liù tɛ, v nɛ ba v don, v nɛ yi v nubɪu Kɛrisɛ yɪri, swɛ, kɔ tíú tɛ wulɛ tɪan wa, tɛ nɛ ba zwèe. <sup>15</sup> Liù tɛ mama, v nɛ dɔŋa v don, v nɛ yi v nubɪu Kɛrisɛ yɪri, kɔ tíú yi lagɔrv. Yá á ga yèé dɛ, lagɔrv nɛdɔ tɛtɛ ba mu tɛ, kɔ nɛ ba zwèe Yɪ con, tɛ jɛ, v pa v t̀àn nɛ. <sup>16</sup> Zwezɪ-Kɛrisɛ nɛ tɪ v mu, v ma lárí nɛ yuu nɛ. Yá kɔ dàn twá dɛ v m̀, nɛ lwarɪ won tɛ, kɔ nɛ yi sonu tɛ. Nɛ dɛ dàn mɛ, sɛ nɛ tɪ nɛ mu tɛ, nɛ ma lárí nɛ duɛn tɛ, ba nɛ yi nɛ nubɪa Kɛrisɛ yɪri, yuu nɛ. <sup>17</sup> Kɔ wáá kɔ pɪn jɪjɛ tíú don nɪ v don, v nɛ yi v nubɪu Kɛrisɛ yɪri, yojanv wa, v ga vɪ, sɛ v san wá. Nɛtɛ nɛ ba wáá ba swɪn dɛ, Yɪ sonu tɛ wulɛ jɪjɛ tíú tɛntɛ bɪcan wa?

<sup>18</sup> À b̀sɪná-ba, nɛ sonu tɛ mɛ, sɛ kɔ ya cígá cígá sonu, ba nɛ na kɔ, nɛ tutunan wa. Nɛ dànà ká ja nii sonu tɛ, kɔ nɛ swɪn s̀ràn tɛ nɛ ywán cɪcɪ. <sup>19</sup> Mɛ nɛtv, nɛ nɛ wá twá nɛ ma lwarɪ dɛ, nɛ yi cígá t̀án. Yá mɛ nɛtv, nɛ nɛ wá twá, nɛ ma ja bɪcan s̀ié Yɪ yáá con. <sup>20</sup> Nɛ yèé dɛ, Yɪ dwɛ nɛ pubɔŋa tɛ, v ga yèé won mama. Kɔ m̀ nɛ yi, dɛ nɛ nɛ caga nɛ t̀àn nii nɛ nɛ bɪcan wa, kɔ ba dɛn jɛ.

<sup>21</sup> À nubisoni-ba, dɛ nɛ dàn nɛ ba nɛ t̀àn nii nɛ caga nɛ bɪcan wa, nɛ wá zɛn nɛ yɛni dɛ, fɛn t̀élé Yɪ yáá con. <sup>22</sup> Nɛ zɪlí Yɪ nii ỳèn tɛ, yá nɛ



ga tɔŋa ku tɛ, ɔ nɛ swɛ. Ku m̀ nɛ pɪn, won tɛ  
 mama nɛ nɛ l̀r̀i ɔ con, ɔ wá pa ku nɛba. <sup>23</sup> Á  
 nɛŋɛ, ku tɛ nɛ yɪ ɔ nii yoo tɛ. Ku m̀ nɛ yɪ, sɛ nɛ  
 kɛ nɛ waa ɔ biú Zwezi-Kɛrisɛ nɛ. Yá nɛ ga sɔnɪ  
 duɛn, ndɛ Kɛrisɛ nɛ pɪn nɛba nii ku yoo tɛntɛ  
 yuu wa nɛtu. <sup>24</sup> Liú tɛ, ɔ nɛ zɪlí Yɪ nii ỳɛn tɛ,  
 ku tíú vwɛ ɔ tiàn Yɪ yɪra, máŋá mama wuuu,  
 Yɪ dɛ ga wulɛ dɛ wá máŋá mama wuuu. Yá ku  
 twá dɛ Yɪ-\*Siŋu tɛ, ɔ nɛ pɪn nɛba, nɛ ỳɛ́ dɛ,  
 Yɪ wulɛ dɛ nɛba, máŋá mama wuuu.

## 4

### *Yɪ-Siŋu tɛ dɛ kɔnkɔna yoo*

*(1 Zwan 2.18-27; 2 Zwan 7-11)*

<sup>1</sup> Á nubisoni-ba, á d̀anà ká kɛ á waa lià tɛ  
 mama nɛ, ba nɛ sẁn dɛ, ba súé dɛ Yɪ-\*Siŋu  
 tɛ. Síún nɛ, kɔnkɔn s̀s̀nà súé luv wa. Á mɛ,  
 sɛ á dí yáá, á miàn ba á lwarɪ dɛ, Siŋu tɛ, ba nɛ  
 jɛ, nɛ ya Yɪ-Siŋu tɛ. <sup>2</sup> Á nɛŋɛ nɛtu tɛ, á nɛ wá  
 twá, á ma lwarɪ dɛ, ku nɛ ya Yɪ-Siŋu tɛ. Liú tɛ  
 mama, ɔ nɛ sẁn ɔ bɪrɪ dɛ, Zwezi-\*Kɛrisɛ cígá  
 nan Yɪ con, ɔ bà, ɔ pa, kan lɪrɪ wá tia yuu wa,  
 ku tíú yɪ Yɪ nɛ ti wá. <sup>3</sup> Liú tɛ mama, ɔ nɛ ba  
 cígá tɛ bɪrɪ Zwezi-Kɛrisɛ yoo tɛntɛ yuu wa, ku  
 tíú tà Yɪ nɛ ti wá. Ku tíú súé dɛ Kɛrisɛ dɔŋu  
 tɛ siŋu tɛ. Á dí yáá á nì dɛ, Kɛrisɛ dɔŋu tɛntɛ  
 wá bà. Síún nɛ, ɔ manwarɪ ɔ wulɛ luv wa.

<sup>4</sup> Á bisíná-ba, á m̀ yɪ Yɪ nɛ ti aba. Yɪ-Siŋu  
 tɛ, ku nɛ súé aba, ku diàn dwɛ siŋu tɛ, ku nɛ  
 wulɛ lià tɛ con, luv nɛ ti ba. Ku m̀ nɛ pɪn, á dí  
 diàn kɔnkɔn s̀s̀nà tɛ yuu wa. <sup>5</sup> Ba m̀ yɪ luv  
 nɛ ti ba. Ku m̀ nɛ pɪn, ba sẁn tɛ tɛ, lià tɛ luv

nə ti ba, nə swìn. Kù mù yiri nə là təntə cuga ba sùràn tə. <sup>6</sup> Nə mù ya Yü nə ti nəba. Liù tə, v nə yèé Yü, v yàá cugu nə sugu. Yá liù tə, v nə tà Yü nə ti wá, v ba nə sugu cuga. Mə kù twá nətə, nə ma lwarì siṅu tə, kù nə yì cígá, də kunkun siṅu tə swíán duən wa.

*Sóní Yü, sə n sóní n duən*

*(1 Zwan 3.11-24; Zwan 3.16-17; Romə tìán 5.5-8)*

<sup>7</sup> Á nubisoni-ba, sonu yì kù nan Yü con. Kù mù nə pìn, nə swéné duən. Liù tə mama, v nə jə sonu, v ya Yü biú, yá v ga yèé Yü də. <sup>8</sup> Yü ya sonu Yü. Liù tə, v nə ba sonu jə, v wà Yü lwarì. <sup>9</sup> Á nəṅə nətə tə, Yü nə twá, v ma biri v sonu tə nəba. D tun v bidwa kələn tə tia yuu wa, sə nə twá də wá, nə na mi tə, kù nə ba zwèe v con. <sup>10</sup> Á nəṅə nətə tə, v sonu tə nə yì. Kù tà, nə nə sóní Yü tə yiri, kù ya, v nə swə nəba tə yiri. Yá v dàń tun v biú tə, sə v ti, ndə nə yuu \*joni vani nə, ba nə gwa, sə kù li nə cuna tə.

<sup>11</sup> Á nubisoni-ba, də Yü nə sóní nəba sonu təntə yiri, nə də dàń mə, sə nə sóní duən. <sup>12</sup> Liù mama tə wà Yü nì. Də nə nə swə duən, Yü wulə də nəba, máṅá mama wuu, yá v sonu tə súé nəba cígá cígá.

<sup>13</sup> Yü pìn nəba v Siṅu tə. Kù mù nə pìn, nə yèé də, nə vwə nə tìán Yü yira, máṅá mama wuu. Yü də ga vwə nəba, máṅá mama wuu.

<sup>14</sup> Yá nə mù dàń nì, nə ga swìn nə biri də, nyina Yü tun v biú Zwezi tə tia yuu wa, sə v jon ləzoni ba cuna wa. <sup>15</sup> Liù tə, v nə swìn, v biri də, Zwezi ya Yü-Biu, Yü wulə də kù tíú,

mánjá mama wuuu, v də ga wulə də Yui, mánjá mama wuuu. <sup>16</sup> Nə mù yèé sonu tə, Yui nə swə nəba. Yá nə pɪn cígá kv yoo tə nə də. Yui ya sonu Yui. Lìu tə, v nə jə sonu, v wulə də Yui mánjá mama wuuu. Yui də ga wulə də wá, mánjá mama wuuu. <sup>17</sup> Də nə nə súé də sonu cígá cígá, ndə kv nə mɛ nɛtv, kv mù nə wá pa, nə zən nə yəni də, fən tɛlé dɪn tə nə, Zwezi nə wá píí v bà, sə v bɪrɪ bɪrà tə. Nɛtv tə, Zwezi dàń nə yi, mə nɛtv nə də yi lɔv wa. <sup>18</sup> Sonu wa ba fən jə. Kv mù nə pɪn, lìu tə, fən nə jə, v wà swí də sonu. Lìu nə yèé də, càn biàn v yuu wa, kv mù nə yáá pa fən jə wá. Kv mù nə pɪn, lìu tə fən nə jə, v ba cígá cígá sonu jə.

<sup>19</sup> Yui nə dí yáá v sóní nəba. Kv mù nə pɪn, nə mù jə sonu tə. <sup>20</sup> Də lìu nə swɪn də, v swə Yui, v ga dɔŋa v don, v nə yi v nubiu Kərisə yɪri, kv tíú yi kvnkɔnv. Də v nə ba v nubiu tə swə, v ga na wá v yía wa, v wàrɪ Yui tə, v nə ba na v yía wa, v sóní. <sup>21</sup> Á nəŋə yoo tə, Yui nə pɪn nəba v nii tə kv yuu wa. Lìu tə, v nə swə Yui, v mɛ, sə v sóní v nubiu də.

## 5

*Kərisə lià dí dɪàn lɔv wiən yuu wa*  
(2 Zwan 5-6; Zwan 1.29-34; 3.36; 20.31)

<sup>1</sup> Lìu tə mama, v nə pɪn cígá də, Zwezi nə yi \*Kərisə, kv tíú ya Yui biú. Yá lìu tə mama, v nə swə v nyɪna Yui, v swə v bia tə də. <sup>2</sup> Á nəŋə nɛtv, nə nə wá twá nə lwarɪ də, nə swə Yui bia tə. Kv mù nə yi, nə nə swə Yui, yá nə ga zìlí v nii yìèn tə.

<sup>3</sup> Á nəŋə, ku tə nə biri də, nə swə Yıı. Ku mù nə yı, nə nə zílí Yıı nii yìèn tə. Yá Yıı nii yìèn tə ka zílí ga ba cà.

<sup>4</sup> Liù tə mama, v nə ya Yıı biú dí dìàn, luv yìèn yuu wa. Á nəŋə nətə tə, nə nə dí dìàn luv yìèn yuu wa. Ku mù nə yı nə waa tə, nə nə ken Yıı nə. <sup>5</sup> Liù təló, v nə dí dìàn luv yìèn yuu wa, də ku nə tà liù tə, v nə pın cígá də, Zwezi ya Yıı-Biu.

*Yìèn tə, tə nə biri də, Zwezi yı Yıı-Biu*

<sup>6</sup> Zwezi nə ya liù tə, v nə twi də níá\* də jana. Ku tà níá cıci nə, v ja bà. Ku yı níá də jana nə, v ja bà. Yıı-\*Siŋu tə nə pın, ba lwarı də, ku yoo təntə yı cígá, Yıı-Siŋu tə swìn cígá. <sup>7</sup> Wiən batwa nə biri ku yoo təntə. <sup>8</sup> Ku mù nə yı Yıı-Siŋu tə, də níá tə, də jana tə. Yá tə wiən batwa tə me yı yoo nədə təntə nə tə biri.

<sup>9</sup> Liù nə swìn yoo v biri nəba, nə yàá jon ku. Yá Yıı nə swìn yoo v biri, ku mù nə dwə. Á nəŋə ku tə, Yıı nə swìn v biri v biú tə yoo yuu wa. <sup>10</sup> Liù tə, v nə ken v waa Yıı-Biu tə nə wuuu, v jə Yıı sùràn təntə v waa con. Liù tə, v nə wà v waa ken Yıı-Biu tə nə, v ja Yıı v ma jì kunkunu, v nə wà cígá pın Yıı sùràn tə nə, v nə swìn v biú tə yoo yuu wa yırı. <sup>11</sup> Á nəŋə, tə sùràn təntə nə: Yıı pın nəba mı tə, ku nə ba zwèe v con. Yá v biú tə dān nə yı mı təntə dəkuu. <sup>12</sup> Liù tə, Yıı-Biu tə nə wulə də wá, ku tíú tə jə mı təntə. Liù tə, Yıı-Biu tə nə təló də wá, ku tíú ba mı təntə jə.

\* **5:6** 5.6 Níá tə yı, ka lə Zwezi níá wa yoo nə, ku biri. Jana tə yı, Zwezi tian tə yoo nə, ku biri.

<sup>13</sup> À púpúní sagi ku tē, à pɪn aba, sē á lwarɪ yoo ku tē. Ku mù nè yɪ, á nè keni á waa Yɪ-Biu tē nè wuuu, á jē mu tē, ku nè ba zwèè Yɪ con. *(Zwan 15.7; Marəkə 11.24; 1 Zwan 3.6-9)*

<sup>14</sup> Yá á nəŋə nətɔ tē, nè nè zən nè yəni dē, fən təlél Yɪ yáá con. Dē nè nè lòrì won, ku twá dē v fira tē, v cuga nèba. <sup>15</sup> Dē nè dàń nè yèé dē, v cuga nèba won tē mama, nè nè lòrì v con, nè yèé dē, v wá pa ku nèba dē.

<sup>16</sup> Dē liù nè ni v don, v nè yɪ v nubiu \*Kərisə yɪri, dē v tɔŋa cuna, tē nè bá ja wá tē va tian wa, sē v jɔn Yɪ. Yá Yɪ wá pa mu v don tēntē nè, v nè yɪ v nubiu Kərisə yɪri. Ku nətɔ tē jē nywarɪ, ku pa lià tē nè, ba cuna tē nè bá kə ba tian wa. Yá cuna duən dàń nè wulə tē yígúré nè yɪ tian. Ku tà cuna yiri tēntē yɪri nè, à swìn á con, sē á jɔn Yɪ. <sup>17</sup> Tɔtɔnyiri mama ku nè yɪ kunkun yoo, ku ya cuna. Yá cuna duən wulə, tē nè ba liù tian wa kəni.

<sup>18</sup> Nə yèé dē, liù tē mama, v nè ya Yɪ biú, Yɪ-Biu Zwezi nè cì v nè, v kúú ba cuna tɔŋa. Ku mù nè pɪn, \*Sɪtana wàrì won mama, v fwa v yira. <sup>19</sup> Nə yèé dē, nè ya Yɪ nè ti. Yá Sɪtana nè dí diàn lià tē mama yuu wa, ba nè yɪ lɔv nè ti ba.

<sup>20</sup> Nə yèé dē, Yɪ-Biu Zwezi twi, v ga pa nèba wɔbɔŋa, sē nè lwarɪ Yɪ tē, v nè yɪ cígá cígá Yɪ. Ku twá dē v biú Zwezi-Kərisə, nè dàń wulə, dē v mù cígá cígá Yɪ. D mù nè yɪ cígá cígá Yɪ, v nè pɪn mu tē, ku nè ba zwèè.

<sup>21</sup> À bisíná-ba, á cia á tìàn nè dē wɔŋwanan tē.

**Yu sɔywáŋó sagɪ**  
**Nuni, Southern: Yu sɔywáŋó sagɪ New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 22 Sep 2022 from source files dated 8 Feb 2022

d18530a7-7259-5f23-92b6-70e3abe5f3fa